

四庫全書

集部

欽定四庫全書

集部

宗伯集卷五

四

詳校官中書臣沈鳳輝

侍讀臣孫球覆勘

總校官編修臣王燕緒

校對官庶子臣鄒奕孝

謄錄監生臣顧裕涇

欽定四庫全書

宗伯集卷四

明
孫繼皋 撰

傳

姚安守秦公傳

秦公者名汁字思守別號次山其先揚之高郵人在宋
國史院編修淮海先生觀有子湛倅常州葬先生璨山
下子孫因家武進之新塘十傳而有瑞五公者為無錫

胡埭贅壻遂徙為無錫人又六傳而鳳山公金起家弘治六年進士仕終尚書太子太保其為尚書凡五文昌之座陟幾徧顯名朝廷卒諡端敏生子二長曰泮公其次也端敏為提學副使河南而公產大梁臬司官舍中故以為名公生十餘歲而以端敏任入太學則端敏為戶部尚書崇貴矣公弗自命為尚書子也晨起從府中攝布襴袍從一童子驅驢入黌舍甚斂稍長益績學工藝文得佳公子聲嘉靖十三年大比順天公所為經義中

程矣中罷自是連比輒報罷而端敏亦且老致其仕家居又公之凡所謂泮者業舉於鄉矣竟天端敏嘿嘿不自得以為人固各有命科名何可必待且任職寧渠非王臣也耶趣公使謁選於是公得南京後府都事到官顏其室曰鍾陵吏隱稱吏隱者明非其志也而公環視府僚率多負貴介習為侈靡即無如絳州陶冶公安鄒廷澤兩君者好學而賢乃相與締好特密時人號曰府中三友云滿三載考持端敏服自官所奔歸服除上書

乞終養母鈕夫人即又持鈕夫人服公前後遭兩喪皆
束身走京師伏闕下涕泣幾上哀憐以得卹典而上亦
念老臣功德隆茂所以褒贈有加公為子能盡力如此
三十三年公再起補右府都事尋遷左府經歷左府者
浙江都司所隸也公計以為浙故多薦紳大夫長安中
彼其故人邑子以軍戎事上府者何可勝數非一切禁
絕請託無以守畫一示兵柄重由是竟公為左府無一
人請託者府以清肅久之擢雲南姚安知府姚安在萬

里外文網稀濶而大姓高某爲不法橫行郡中吏莫敢詰問公乘傳至其界亟收捕下獄吏乃大驚不意新太守張設如是惴惴相戒毋犯法犯法太守立碎汝矣其爲政凜烈皆此類也而公自其再起爲都事經歷時嘗從輩行一往見相嚴相嚴與端敏有故遇公大善至命其子爲具召公而公從座上語數侵相嚴子又其得姚安實太宰李公默知公久次以畀公而相嚴子所前屬吏部兩人者乃皆不得以此得相嚴子恚恨會考察京

朝官有詔當公經歷不稱職免是時三十六年也而公歸自姚安自念偃蹇終不能取容當世遂絕意仕進構小樓名曰萬卷聚圖籍其中而身為蠹昕夕誦讀讐校至胸袖間朱墨狼籍為蒲不厭間遊於酒酒酣指大白徐言曰我於世杳鑿非是物誰當我親者人益以此窺公之有所托矣而久之公遂病枯其半體然公不以病盡罷酒及廢書不觀乃竟坐病卒於是公年七十三歲云公孤介貞潔自其天性凡三爲府僚一守遠郡絕不

肯妄通謁造請諸公亦不肯非誼有所詘下乃諸公名
端雅者即不謂公簡顧或加愛敬焉居家幾廿年門下
絕不妄通一客郡國守相希睹其面而顧獨好與一二
老僧譚說經史白首相往來公所以偃蹇不能取容當
世者也故公之卒也其名能知公者以為公馭於繩墨
又守郡日淺無所畢其奇而知公深者乃謂公當汶汶
之時列冗散寘遠外激辭抗論為獨信其節為公恨者
以為公一出而躡徒連蹇一室中以老而為公幸者乃

謂公愕愕而得全為免於道邊之歎也公所著有三才
通考行世懷李齋集錄詩賦文讚銘若干篇俱藏於家
公有三丈夫子長柄用諸生久資貢上太學次楷先卒
次柱中書舍人左遷王國官二子皆伉直有父風又皆
博學好古公所為不亡以此

史繼阜曰余觀秦公志操介特此非獨其天性然也蓋
亦以矯時俗之趨焉當嚴相時一國之士若狂矣公憑
席先世之寵靈抑又有故假令少自屈損出門下與之

暱朱丹其轂豈足道哉然公方且不勝憤懣不平訟言
諤諤至面折無所避身雖黜辱正直之氣伸矣公所以
爲世風深哉今夫松柏無弱枝鸞鳳無卑翼公之爲端
敏子者足矣

樵陽子傳

樵陽子者蜀灌縣青城山樵子也本大足縣人姓雷氏
方誕有踞而募於其門者父若母因呼之化緣化緣可
二歲父若母死安縣安縣民陳和養爲子養十餘歲陳

夫婦亦死化緣孱然一孤童耳則托足青城山下童翁家童翁家又貧無所得食則入山斫柴售灌人以活灌縣人持升米或碗許米市樵子柴盡一挑樵子不計也一日入山天大雨雪迷失道入山益深雪盈六七尺許所見惟高崖萬丈古木架陰壑飛鳥都絕忽一老人鬚眉皓白手執拂子招樵子坐頃之又一老人貌頎腹便便衣大袖紫衣亦來共坐如是累月並有所指授其語秘不傳已乃導樵子大樹下指而曰是中爾前身所托

也坐樵子石上設十二拜禮恭甚號之曰樵陽子以故
人皆稱樵陽子云老人既去樵陽徘徊巖谷間徃徃聞
隔崖彈琴聲或人聲及跡之無有也結跣趺大樹下凡
百數十日敗衣掩形頽然槁木采藥人遇而怪之佛耶
仙耶頗以語灌縣人灌縣人轉相語羣走物色識爲童
家兒是兒陷雪窖一年久矣曷不死寒餓死虎狼乃作
如是相事聞灌縣令令景某也駕而之山中臨問狀耳
所對斑斑應古記非童子口吻也自言吾前身在樹中

令便使人斫樹樹轟然若雷震者火發其腹劃然開現
委蛻焉髮垂額覆領指爪逸身其貌像則樵陽子也令
驚嘆而返尋並蛻坐處得一石匣匣有文字亦秘不傳
有布衲有鐵冠絛有劍樵陽子以為已有劍柔繞指今失所
在其時令下教製龕奉樹中蛻築庵居樵陽子於是樵
陽之名一日而傾動州郡士庶競來瞻謁樵陽子遽能
談人未來事又能已人疾來者愈益多樵陽子避而匿
安縣之天池山士庶則亦走天池趾相錯其自鄉薦紳

以迨官長車蓋相望而獨石泉鄧令某惜墨吏也問丹
何居樵陽子云爲令廉而仁是官人外丹令疑謂已恨
刺骨而孫弁某將因緣爲功陰教令名之妖人上變告
臺司用令追捕毋釀亂事下成都張丞某逮治樵陽子
朴野至則箕踞而詈丞大恚罵何物囚敢爾痛榜之無
苦也繫囹圄三月獄上而王觀察某特廉其非辜覆丞
牘身爲白艾中丞是夫童而好修安所涉人間世而惑
衆爲事得解久之譚中丞來檄所司即鄉所築菴建大

通觀遣還山厥後凡開府及領藩臬至者率召見樵陽子樵陽子率一再往不拒也顧其意忽忽不自得會吾常吳參知以捧表過家謀挾之來江南樵陽子洒然從焉來則止常之永慶寺亦數過吾錫山龔方伯城南別業稍一游武林西湖樵陽子所至江南人就徵未來事若丐已疾者麋集樵陽子不甚應間露一斑即徃徃中樵陽子在山專生餌黃精出乃復火食食止蔬素然終歲廢便溺良有絕異者故本名強而自名曰思道亦書

出山後事相傳其大父孔文進士也與內江趙文某同榜友善父鳴春蓋其鄉人為樵陽子言如此留未一歲歸焉贊曰昔東林老古錐定我眉樹中七百年既出求復定去今青城樹中身托樵陽子是兩也玄與禪有異乎張紫陽因折瓊花事推明陰陽性命之變以必得金丹乃是最上乘法通乎此可以知所竟矣余不解爲二民言幸獲習樵陽子其人冲夷恬穆不介人我教人只於心地上海領宗旨雖以通儒者言不謬嗟乎余安能極樵陽

子所詰哉

記

脩建新設常鎮兵備道江陰縣駐扎公署記

維萬厯之二十有四年巡撫都御史臣可懷巡按御史
臣久徵交章言臣幸得奉璽書巡行江以南臣所轄凡
蘇松常鎮四郡所與共事凡兵備憲臣糧儲守臣二道
糧儲得兼治水利不得治兵而兵備臣獨往來督察盜
賊理獄訟歲半在道路不純治其官即倉卒有急不暇

左右顧非縣官所以重畿輔慎封守至意臣檢故牒肅
皇帝朝以倭患專設一道備常鎮兵事寧而罷之頃倭
又見告矣宜以時嚴爲備臣不勝愚心昧死謹請裂四
郡爲二併兵糧爲一前署曰兵備道更降勅換印對掌
彈壓勿復罷便奏上上下下其議吏部吏部覆如都御史
言制報曰可於是參政彭公解糧事以本官兼僉事領
常鎮兵備道事自蘇移駐常之江陰前是江陰故有兵
備道官署在時平無事縣又徵僻使者不時至歲久圯

壞即餘址十五築爲官庾矣公業用憲今當移駐謀所以繕而新之而又兢兢焉唯舉贏之是虞下檄所司毋重爲使者治舍煩苦百姓某縣積鏹若干緡可以佐材石瓦甍聚餼糧毋動民一錢一粟一切緣舊取嚴密而已毋傷侈靡所司守要約惟謹乃以日月之吉庀役始事葺所欲腐益所未備凡爲重門爲堂爲寢樓爲廡總若干楹則葺凡爲賓館爲神祠爲燕圃之亭爲從史之室總若干楹則益不踰時告成崇基內聳修垣外繚言

仍昔觀亦煥新米蓋屹然雄鎮云公既莅鎮斯署則屬
史臯使爲記惟我太祖高皇帝起淮甸取金陵下鎮江
克常州遂拔江陰江陰斗大一城耳當此之時羣雄所
在割據名都大邑未收者何限乃太祖得江陰若得一
敵國使所親故江陰侯吳襄烈鎮之且戒之曰毋逐小
利毋與賊爭鋒保境安民而已襄烈守江陰十餘年卒
以其力蔽常鎮以待太祖剪漢而威吳平定天下襄烈
亦用扞禦功予券封侯神謨駿烈垂賁宏遠矣代襲熙

洽議者不深惟桑土衣袽之戒猥言省官省事全吳並
江海千餘里倚一使者以威聲遙制雖鞭之長不及馬
腹非完計也陛下神聖惟是纘戎保大憂勞宵旰不難
采部使者言分官併職畫地置守與吏民更始煌煌虎
符將太祖之神靈實式臨之語不云乎猛獸在山藜藿
不採自今使者以春秋抗旌蓋江山潮汐之間既令既
申戈船如龍組練如雲蓋上以控金陵之門戶而下以
扼吳越之襟喉近以消潢池萑苻之孽而遠以褫島夷

鯨鯢之膽建威銷萌於國家豈輕也哉夫草昧而置將
則建閫閫重承平而假臺察則創道道重然吾聞襄烈
奮行間饒勇畧乃其在鎮仁恕清儉食不兼味好獎名
節士興文學絃歌相聞祭征虜羊開府之流亞也公虛
和玄朗其廉惠譬竊脂之不穀騶虞之不肉本之天性
顧其胸中之甲兵即聲色不動而分數甚明隱然以身
任金湯謂今之韓范非乎夫作鎮自天造以逮今茲垂
二百三十年鎮以復新而其人正得文武才後先照暎

以幸此一方事興復良若有待者以斯而知地以鎮重
鎮又以人重非苟焉而已臯既推明往畧布定近令而
又本人地之相爲重者以諗後之治是鎮者庶考而式
焉都御史爲趙公巴人御史爲鹿公定興人彭公名國
先德化人而董是役者爲常之同知史君名起欽鄞人
皆進士

尤氏章山新阡記

吾邑西蓋有九龍山云蜿蜒東走臂一支而南勢如奮

爪然是其爲章山吾友刑部主事南華九君卜兆於茲
峰巒迴合溪流映帶鬱乎佳哉信天之所留而神之所
錫也於是君之配葛安人卒一年徃矣今年癸卯十二
月某日之吉以葬而謁余爲記夫余不能爲形家者言
以定茲阡之必安且吉也乃徵安人賢而有以定茲阡
之必安且吉也安人者處士隣橋公女也始君之尊人
贈承德郎恩樂公與處士公善故安人歸君安人入門
不及事其姑馮安人而事其繼周與其側室吳斷斷如

也安人從中爲宛轉調輯而帷帶間兩相釋忘諄矣贈
公入室而融融如也蓋媮悅如七箸忘老矣君讀而不
能無虞於膏火安人罄奩具買田負郭而君忘貧矣君
之成諸生晚尋舉於鄉數試禮部不利已丑之後主者
得君卷大珍賞度之秘臨籍却遺之安人曰命也而君
忘誣矣於是君用選人拜萊陽令安人弗從曰妾從誰
爲君率子婦謹烝嘗者妾從誰爲君督童奴守田廬者
然已旁飾一姬侍行不令君耽衙宇憂局鐻事也君治

萊陽而效晉令宛平風雪中以問過里門意不無少繫
戀安人曰君用高第徵而以情累羈耶天邑翼翼聲易
馳上慎自愛愛黔首君凡兩爲今後先可八載許治行
表東海疆執聞輦轂名在御屏擢爲尚書郎繇安人留
治家得一心營職云安人一子擁愛之甚甚於它人家
母子然小有過必誚讓無所貸今諸生盛明是也克厲
其業以有聞於時二女粧遣皆手自辦治更能推其餘
以佐其兄之子而娶女而嫁者要亦有節度無侈溢也

性淵靜足不出戶以內聲不出戶以外被服縞素即于
歸時不之華袷笥之而已雅不欲以口食事刀俎晚而
構一閣禮佛其中遂斷葷肉不御嗟嗟生長饒裕而躬
儉嗇借守隱約而違宦達再傲封號而秉齋素度安人
夷然不知夫子之有官與其身之爲官人妻也庸詎知
世所紛艷爲珠琲羅綺者哉不賢而能之乎今夫形家
言儒者不道也而亦不廢也故牛眠獻異陶家顯仕書
生道逢袁氏五公所從來矣余則以爲閔宮靈壤天所

留也而天益謙神所錫也而神福謙以安人和順明淑
徃徃有非女婦人所敢望者而未嘗一日從君于邁沾
溉榮祿年壽又不讐斂餘發祥以祚子孫後之昌其可
最歟芝原灤灤龍章煌煌有來未央不直鄉者兩恩命
爲生前光而已爰抽彤管勒玄石以跋是爲記

虎丘重修五賢祠記

虎丘之北岑舊有平遠堂以佐名勝豁游目而久之乃
爲龕以祠五賢則爲唐韋轉運白少傅劉賓客宋王翰

林蘇文忠韋白劉先後繇重職補外刺史蘇州王由大理宰長洲而蘇以南竄經涉不啻數數然咸有樂乎斯丘者龕之設實自近歲江長洲始後十許年爲今年庚戌戶部陳公用望郎權關許野自公來登觀堂宇漸圯堦砌都裂慨焉捐權之羨凡百有廿金以付寺僧明鏡仍選官者之才而勤者使飭而新之工竣屬余記其事余於斯役而竊有感於斯丘之有數君子也夫此數君子者文章風節凌跨一時焜燿千古而或一麾以出或

三黜以徙羈縻流浪於江湖之間而斯丘至今幸得借其風流以爲重假令當時身不出國門官不離蘭臺鳳閣以老雖勲業在朝著望斯丘迢迢東南一坏耳尚誰得而有之哉蓋惟天也若故偃蹇其遇而飭予之以吾吳之佳山水而數君子因得稱隱吏遷人徜徉笑傲於幽竒葱菁之區流連題咏低回而不忍去夫亦重有感也然則斯丘也其遂爲數君子之丘歟客曰不然前此闔閭不有之以爲墓乎而虎不至今蹲也是闔閭且不

得而有也生公不有之以爲臺乎而后不至今點頭也
是生公亦不得而有也王珣不有之以爲宅乎而非禪
宮梵刹不至今永也是王珣曾不得而有也矧宦轍謫
轅飄忽往來譬若雲萍然烏得而有諸嗟乎惟其遞處
之遞去之而終不得據以爲有則天下之倏忽滅沒轉
盼而不可以爲常者皆是類也彼區區得喪寵辱尚足
以挂高賢曠士之宵懷哉吾以知數君子者其深有得
於斯丘也矣今吾試與公憑高而眺臨深而觀晨霞之

粲然夕照之軒然而禽聲之嚶然非夫數君子之文章
耶池水之泠然石仞之礧然而松柏之蒼然非夫數君
子之風節耶以至歲時寒暑之推遷風霆雨電之不測
卉物之凋榮而煙嵐之聚散又非數君子升沉顯晦之
變態耶公其亦有俯而思仰而會曠世而相感者乎是
數君子之寄於斯丘者其迹而寄於公之俯仰間者其
神斯丘之寄其迹杳乎其不可尋而公之寄其神者躍
乎其如有在也祠之右又有宋尹和靖暨國朝胡別駕

二祠和靖宋儒故結庵丘之傍而別駕在正德間於郡
有保障功公概而飭之固宜祠下爲重臺五盤旋蜿蜒直
丘之麓公所創也公名訥謨闡之長泰人萬曆辛丑進
士

引

清對館課引

晉劇陽子雅善射在後將軍府初不見知已備數登場
發無不中舉坐鮮所敵後將軍嘆曰吾之不足以盡卿

才如此射矣後果顯名惟人主亦器重之望而曰魏舒
堂堂人之領袖也劇陽於是稱寧氏貴甥符宅相云蓋
余兩甥爲劉氏仲若季仲常吉季常康頃者季得雋而
人若爲非意也者即其家衆與其親交間亦若咄咄曷
不仲而季也俄而試卷出而衆乃謝知季晚矣咸謂之
子機神風骨殆飄飄若凌雲乎哉尋又出其牕草而覽
者愈益慕嚮之斯其劇陽之射耶非耶雖然士所用名
世詎茲藝維藝也攻苦變化亦何窮之有進而務深沉之

思挾微眇之趣規闊遠之圖落落穆穆毋忘後將軍府
時雖以領袖後來可也

跋

書西郭趙季梅花卷後

邑西郊趙季玉川子生而有深心雅尚於梅也家去惠
山可三里而近山之陽爲太湖每花時駕籃輿遵湖行
投深塢絕壑或殘菴宿壠低回物色不惜買花錢賂守
者折取其樛枝樊然懸輿傍歸也枝皆盤屈夭矯作虬

龍飛舞勢既瓶而供精舍間度一枝兩枝齋壁召所善
幽人韻士畢來歡賞季善飲酒所善亦多酒人相與浮
大白花下徑醉客狼狽睨童子將去主人不復問其踈
豁如此吾山中諸貴家園林若碁置徃徃植梅數百株
列亭榭其上彌望如雪而季以爲此第以奉裘貂鼈鶴
舞衣歌板之娛耳即嶺頭標格不亦微減乎哉掉頭去
去不一瞬惟是條然獨徃必其孤芳古意亭亭塵壒之
外而後以辱攀摘季雖布衣無名位可以震世揆物乃

其意尚倘亦有闡潛光而厲隱操之思耶彼灞橋驢背
上人風流耀千古不知其會心處於季何如也吾焚魚
十年往矣揚州官閣非復吾意中事願爲季扶杖屨以
時從游湖山間幽遐之觀使邑人益搜剔巖穴竒品留
異日一段佳話於是季有卷題諸翰林詩其甥周太史
引其端而吾復爲之識其後

贊

顧封君像贊

爲郡丞之子而口不厭脩澹睨賻贈如睨敝屣爲柱史
君之父而足不踐公府遠貴勢如遠伏畧輟窮經而馳
贊書而曰吾何德以居釋青衿而披繡衣而曰吾何福
以幾新知豈不樂一丘一壑惟老友是託以娛觴酌時
局豈不焜一簡一牘惟古格是覆以砭表暴凜兮其若
秋澄有高而陵有卑而乘我諧以丞煦兮其若春融有戕
而封有鬻而宗我震以恫於狀有之不可得而踈不可得
而親穆然游乎其天而泊然遺乎其人蓋閱春秋八十有

七而葆玄素居然一日也斯其爲行之質而民之逸者歟

質孝先生贊

身不離閭井而逋播是邱名不越庠序而鄉域是率跡不踐規矩而入紫陽之室行不涉幽眇而應芝雲之茁蓋先生之文不勝其質先生之孝質有其實故望其容者以爲有仁人君子之風而窺其微者以爲抱終天九地之恤耶

題茅平仲小像

骨類節俠胸有奇字五侯曾游千駟弗視老不廢吟貧
益好事汝或予頷予言汝似

自警

匪徇貨賄詎婪酒食心熱手快意汝病惑不療將深從
偏處克筆管牢把耳孔堅塞既融俗猜亦保玄德

議

東事議

議照東封一事當事者殆欲羈縻內寬兵食保屬國以安中國也初亦未甚失策乃其失在未成封而先撤兵劉綎之兵自朝鮮撤南兵自石門寨天津登萊撤而吾備禦少衰矣二使同在事同居海上脫者言變謂倭已啓疆留者言不變謂倭方屏息悠悠之談不皆可據語不云乎無恃其不來恃吾有以待之謂宜急設謀勇大將宿重兵營鴨綠江上持重據要以固封守益設裨將提游兵直呂順口耀威揚武以防奔突並海諸衛道若

北之天津山東之登萊南之淮揚吳松浙之溫寧閩廣
之興漳惠雷諸處倭無所不入我無所不備察舉將吏
擇其可者責成修飭毋擾毋玩是守在内也朝鮮之烏
嶺一大要害也速諭其君若臣使併力扼此嶺它扼塞
亦堅壁守之倘其膽怯傷弓不堪賈勇吾防倭大將不
妨走偏師佐彼當關報急則往事定則旋蹙借則因糧
久戍則屯種是守在外也夫守在外非為朝鮮守也為
中國守也守在内非為倭變守也即倭不變亦弗可弗

守也至於倭迎封楊方亨渡海而冊可也不為中國榮
吾不為當事者功倭不迎封楊方亨完壁而歸可也不
足為中國辱吾不為當事者罪必遣科臣則權駐節烏
嶺北俟迎封之舟至而後馳釜山可也不遣科臣則降
節付楊方亨令奉以行事可也大抵備禦必不可不修
朝鮮必不可不保而封事則原以示羈縻不得全恃亦
不必中罷謹議

冊定吏部劾勞議

近考勞以定優缺後先較之往轍下首引人不由官而
由吏上首選官不任法而任情誠可稱澄清矣惟本部
請旨初意原欲官憑籤定乃該司議報之冊仍是缺坐
名給茲於掣籤之法不矛盾乎且部以外用籤部以內
定缺何以令衆庶見也今去萬曆六年幾何日也當是
時止十三項人耳陽城一倡二百年積弊賴之如洗今
効勞乞恩一選司已加至六十九人矣而四十四討缺
之當該不與焉舉內外美缺共垂涎者冊開才六十六

處如之何能推其餘核以少庇孤寒也諸賢各負建立
可沿習濫觴而不共肩之與議法之體止當各司定為
規矩明開項數令各官吏相與持循似不必某某如何
以致人人乞哀即如効勞難裁諸賢掣肘非以項頭為
病根乎斯固奉旨各衙門皆有遞減者也不則革役究
遣矣明綸森嚴本部吏獨格不行且有增至數千者今
當明立冊籍實書銀數除往事姑不究外此後務奉明
旨與別部一體遵行此項另造一冊先報查考清弊之

原一當議也効勞一十三項三年許選部規有成範矣
似難更易既欲不礙掣籤止當量與地方或共衆與三
四五籤之內或量減其三十二月之期若有假期即不
復叩除以厚之矣中如旨意官頗有使費當議賞班選
司本頭獨勞各司毋減月給總之成此掣籤之公法而
已若有悞事仍司務廳立一紀過之簿稟堂遲選幾月
亦所以教各役之小心也二當議也各司當該有缺美
者如選司之僧道科求賢科給假科功司二考科三考

科雜職科封司實授科撥吏科勲司報復科每年獲利訪俱千金近日陸士俊事是明券也雖不考中誰不援例而入哉三當議也効勞之吏似當酌定行頭必用二考為便又如同一火房在司中七分之銀稟告不足在三堂一毫無與俾月備茶又如司供役人必賞缺司務借役人止賞銀推之後堂承差朝房勞官皆令自為備茶比及討缺藉為口實此當人各量給毋令賠費法始可行四當議也大一石係吏道首選比其成也得進衛

幕祭先人稱貴顯矣徃多輕畀部人不律者予以知律不職者予以稱職而牢不可破其故何也又其入部以小行頭到部加大行頭當其吏也求中求揀及其官也欲援欲缺似此無厭効勞何所利賴而必欲為每事玉成如此耶同心節制似非過刻五當議也此就本部一耳一目心思聞見求商榷耳諸賢同心為國深願補我不逮各出高見則本部斂衽受益矣四司公議定日仍欲策報叙此於端並列會議姓名以見一時共事之雅

外總冊一本分冊五本備會議用

建橋事原

南河之宜橋也去水故也北河長安橋之不宜石也來水故也長安橋石而兒童為之謠薦紳蒙其殃議毀仍木久矣而弗遽毀也因故也橋南之議相傳發於未翁閣老昌於王暘谷兵使而頃畧鳩於華元阜鴻臚蓋邑父母嘗捐十金驅石相基業有端矣而弗繼也無所因故也夫宜繼而弗繼與宜毀而弗毀皆邑之闕政而吾

儕大夫士之恥也。臯不肖生且晚，不當首事，顧私念賢者宜為其大而不賢者宜為其細，長者宜任逸而卑者宜任勞，則試號於衆曰：「長安石橋盍毀？」諸僉曰：「然。」又號於衆曰：「盍因毀以為成？」因北以為南，僉又曰：「然。」然而其為工尚鉅而其費為不貲也。方今水衡無錢而必仰給背於道，築長府有誠而必泛募，疑於箕斂則茲役也亦惟是吾儕大夫與凡為大夫士之父兄子弟而勇於公義者之事也。於是相與推擇忠實有心計若華氏元悌。

陳氏治道四三輩綜厥務而遍以冊告請寘筆焉倘曰
形家之談儒者弗道也且禍不必我先福不必我後則臯
方憮然內媿赧然色沮不敢復言之矣

啓

請呂老師啟

伏以周室羅才聖世荷葑菲之並採虞廷輯瑞清時忻
桃李之俱榮感恩私切乎瞻依門牆日麗精意跂承乎
提誨几席風生肅効燕私齊敦鴻衍恭惟上柱國呂老

師閣下斗躔毓粹粵嶠鍾英名奏金墀采映祥雲五色
書僿石室藜然瑞靄三冬草麻則奎壁晴聯敷藻則絲
綸夜靜道勤思乎經天緯地功茂起乎贊化調元履北
扉升東序之班清華游歷館南省晉中台之秩密勿崇
參叶符帝賚之良師表人倫之重當今上沖齡御歷運
啓龍飛肆先生妙簡掄文光騰虎變燕臺高築希來千
里之竒藥籠傍儲并蓄寸材之陋以茲踈逖與辱甄收
釋褐春官知已多慚於白壁謁銓天宰儒生何誤於青

袍紛中外以分曹自是難同治鑄總後先其儋爵應知
盡屬裁成有意酬君忍負先資獻納無嗟作吏俄驚隙
景居諸於是三載屆期九州述職奉中朝之玉帛藩服來
同萃上國之冠裳公門至止誰道絳帷之遠隔儼師模
依日月之間第聞黃閣之深嚴瞻弼直暴雲霄之上於
是月某日謹諏穆卜預啓芳宸玉宇陽迴薦嘉旨於溪
毛澗藻沙堤候轉移景曜於太乙文昌期教令之重申
表盍簪之協豫伏望鑒其悵悃枉以清塵曳玉鳴珂奉

步趨而是則是傲霏金屑玉聆咳唾而為訓為彛某等
無任欣幸懽祈之至

請何老師啟

伏以朱衣校藝品題昔重歐公翠幄傳經忠謹今推程
氏循分敢稱乎桃李感恩胥跂於門牆欣協豫以來同
擬乘需而啓燕恭惟大師相震翁老師閣下粹毓中嵩
祥開北斗六州發解文章魁洛下之英三館蒐儲圖史
讀寰中之秘載筆於石渠東觀燃藜於天祿西清錦帙

牙籤日侍金華之直銀章青綬天臨玉筍之班流風雅
為家聲蚤是襄陽二杜振英華為世重全凌巴蜀三蘇
揖讓人主之前陪游相君之列當今上沖齡御歷運啟
龍飛肆先生妙簡掄文光騰虎變盡東南之美將收竹
箭之奇空西北之羣并相駑駘之陋茲今海邦邀賤之
士獲廁天府賢能之書傳食而來待公車者可百十輩
挾策以對蒙賜第者殆十九人去住雲泥慨當年之蹤
跡浮沉日月逢此地以踟躕蓋虞廷考績之方終又周

室羅才之復始膺門鵠立緋袍綵映於青袍孔帳鱗升
內服簪聯於外服不作渡江之橘自隳先資還同傾日
之葵齊聞後命謹於二月某日陽歸玉署候轉沙堤鼓
瑟吹笙再展鹿鳴之會陳籩設豆期敦鴻衍之懽伏望
下蓬禁之清陰垂菲莛之末照鳴珂曳履儼師模而亦
步亦趨肩玉霏金闈大道而是彛是訓某等無任忻幸
懇祈之至

戊子新春元會請令公啓

伏以天府升名擢桂快月中之步師門服義烹葵符雲
上之占歌鹿為榮登龍有素茲擬月之某日愛宜冬日節
應春陽懷國士之深知人疑孔鑄忝鄉書之列薦世目
周楨誰實栽培自喜方滋桃李何當補報且庸羞彼藻
片願分彈琴半刻之陰來賜揮麈千言之誨遙瞻下鳥
敢告前駒謹啓

請林邑侯啓

竊以彈琴歲久花封五見春風飛舄天遙槐陛再朝正

月情闕秣馬色動歌驪肅詹來月某日言掃蓬茅薄羞芹
藻借戴星之暇暫許停車遲卜晝之懽聊同卧轍惟使
君計已當及瓜而代用汝作霖若童子可能復騎竹而
迎望公如歲鳴騶是聽稱兕為期謹啟

請林邑侯尊翁方伯考吾公公啟

竊以返旆九天薇省遂呼嵩之祝停驂百里花封紆陟
站之瞻薄體邦君聚順之恩朋修地主留懽之燕茲惟月
之某日小春應候冬日宜人望四岳之儀刑高山在仰鑒

二泉之澄澈明水堪羞畫卜早諧暫借半晌庭槐之蔭
寒香晚媚同餐九秋籬菊之英誰家坐隔屏風共羨思
華日近此會談揮麈尾俄看妙論風生敢乞西山拳石
之靈用傲南極一星之照車塵是望闕氣同瞻謹啓

送子入學請令公及學博啓

竊以在泮采芹發軔初騰驥足肆筵羞藻觀旂爭聽鸞
聲惟髦士鵠袍謁廟之辰正神君鳧舄升朝之日聖門
七十子服孔子同游巧附希蹤帝座五星為郎官內

召仍勤盛舉敢侈絳帳極一時之選懸知冰壺生六月
之寒聞絃歌暫蔭甘棠奉璋瓚寧忘棫樸負墻以候重
席為期謹具啓上

請許令公啓

竊以才雄百里循良高換縣之名福蔭二天殊禮荷式
廬之重恩先野老頌滿神君卜茲月之某日薄采溪芹
言陳水薤愛宜冬日甫踰添線之辰歌動陽春擬借鳴
絃之暇咳唾想珠琲錯落光輝希冠劍從容稱兕為期

傳騶是聽謹啓

六十自壽請令公諸親友啓

竊以正朔際春朝百歲巧逢新歷者年安晚節一生甘
老殘編巖居真荷主恩川祝敢忘賓貺謹卜月之某日
東風應律南極分輝燈焰吐銀花映月借九霄未照歌
聲翻白紵遏雲傲一顧殊榮行觴擬申頌椒辛檢籙辛
甫周花甲庭迎舞鶴門聽鳴鸞謹啓

宗伯集卷四

欽定四庫全書

宗伯集卷五

明 孫繼皋 撰

尺牘

答林明府英麓

曩濫棘闈獲親芝宇再從京輦相遘公車而一別忽隔
五秋兩地迴逾千里蓋明公牛刀試邑僻守花封而不
肖雞骨支床薦羈艸土每披文籍想見光儀茲者猥勤

落月之思遠辱非時之貶損俸佐食客義埒分金遺書
慰故人心勞勸駕顧不肖深悲負米甘老前薪幸而安
先將永托松杉舊壠藉以報上似猶贏桃李明庭第需
仙鳧上國之徵用穩野鹿長林之卧願終美業亟迓明
恩謹謝不次

答陳學博

公讀藝名場夙標赤幟傳經學舍高擁絳帷雖司業之
酒錢自是時分鄭老乃陽城之月俸豈堪致譽陳長而

載賁華箋仍貽渥貺心勞勸駕疑車馬之在門誼比彈
冠意璫貂之虛席顧不肖常悲負米甘老積薪不通政
府書久矣木天無夢願守先人冢傷哉草土餘生政使
陳人之見收亦須改歲而後發預叨遠餽深感至懷下
拜媿其何名聊酬將茲不腆皎相思其如日敢埒報瓊
紛聚樂之若雲想勤鳴鐸願言報德用迓新除謹謝不
次

答董大宗伯潯陽

嚮攜弱息于往慶門旣憐其稚齒童心未嫻禮法復媿以貧家薄遣匪稱高華敢望宜人懼弗任婦而我太翁老伯恕其苟簡轉篤殷勤鑒其真誠曲加體念慰勞稠疊款洽留連情文具隆內外胥悅若乃姑視媳若女而相覆以慈婦以夫為天而相成以敬此家有嚴君之效而門多和氣之徵也不肖臯喜慰特深感慙尤倍自還宅里每跂門牆而目眚耽延忽踰三月心神潰耗未遣一書乃我太翁老伯分北牕高卧之涼動東閣豪吟之

興貽以拱壁餉以多珍凝睇獨勞眷思知切不肖臯奉
揚傳示誇以為榮下拜仰瞻食而必飽矣起色方新寸
械陳謝承顏有待九頓為期

又答

臯艸土餘生木天斷夢而忽聞朝命俾貳宮端自惟涼
德鮮才無當恩數亦知分華割采幸藉寵靈蓋我老年
伯一代達尊三朝元老海宇偵其衰健卜世之安危廟
堂察其隱揚定人之用舍吹噓所被枯朽為榮而臯夙

叨肺腑之親每沐齒牙之潤惟誤而推轂施於所不知
肆濫而起家授以所不任十九在外念鷓鴣之會久稀
四十無聞嘆犬馬之齒已長虛生自惜踰分多慙遠勤
勸駕之箋載憶懸弧之度劬勞增其孺慕報効矢此愚
忠敢昧隆知惟深極感尚俟游子成行之日跼履以登
專祈仁人相贈之言書紳以誦謹謝不次

答牛齋院春宇

臯久甘家食忽荷朝掄豈伊簪履之微曾有衣冠之譽

惟我老公祖獨持國紀兼秉人倫意採諸月旦常推轂
於所不知肆噓以陽春獲濫竽於所不任有心慕義無
路酬知不圖柱後之威嚴載枉臺端之間訊霜迴栢府
字呈屑王之竒日過花磚人拜兼金之賜瞻依益邇循
省為榮欣逢攬轡而巡即西賊南倭澄清可待敢不彈
冠而起將北門東觀馮藉彌深庶有時儕彼都人避鮑
氏之馳矢他日報以國士化楊家之雀肅茲展報粹不
宣懷仰冀台慈俯垂鑒察謹附謝

答聶按臺惕吾

惟茲畿甸總隸觀風諸在里紳並蒙覆露而某瞻依更
篤寤寐常勞未遂識韓空知責沈茲者忽勤鼎札遠下
衡門挾栢府之清霜字霏玉屑賁花磚之永日封寄瑤
華拜賜獨光締盟何幸竊念今西賊東倭吠犬傳烽之
候惟我才人志士聞雞擊楫之時老公祖文武全才經
綸大手繡衣白簡居臺敵寢邪謀鐵面丹心憂國人推
石畫忻逢攬轡敢後彈冠不盡感懷願垂嚴察謹謝

答錢憲副養庵

通籍廿年偃蹇誠知量已升榮三事遭逢偶際乏人茲
惟聖主一時過誤之恩亦由慈君千里帡幪之庇而老
父母近看除目遠用慰心信而未能久矣愧漆雕之仕
喜而不寐居然許樂正之優爰賁華箋猥頒腆貺珍重
谷君之札搖綵筆以成文殷勤鮑子之知損食錢而見
餉某躊躇累息匍匐深維無路仰酬實勘瓊瑤之報臨
風下拜難忘金玉之音聊托緘題載抒感激惟老父母

清水比節化日同仁三仕一官到處盡沾棠覆九遷一
載非久將遂萍依尚冀鼎調俄膺晉命謹謝併祝

公啓范司成屏翁老師

公車奮跡廿年懷一日之知函丈違顏千里恨三吳之
隔幾勞夢寐獲上興居伏惟老師閣下朝之羽儀人之
模楷傳經比於劉向為帝師亦為國師秉德方之太丘
應人瑞亦應天瑞高文大策總國猷鴻業悉藉以千秋
直道誠心雖時宰要人希得其一字以故中路之風波

不免然而寰區之斗岱彌高惟舊學有若甘盤即名德
不輸君實而人情逐世吏道乖方豈常見齊民月旦之
公何致煩部使秋霜之烈訝滄桑之將變定自驚心思
水木之偏親空多扼腕偶聞羽便為告心勞所望老師
處困而亨以靜制動白衣蒼狗笑浮雲之幻態何常丹
壑青松信挺雪之貞姿不改勿為鄉里小兒所寤益珍
蒲輪待起之身是固門牆下士所期願卜衮服重來之
日生等臨狀不勝拳拳懇款之至

答顧太史開雍

某幸聯桑梓獲近芝蘭報下金泥彈冠色動計傳苦由
投匕心悲誼本篤於通家情復殷於同館顧自几席一
拜迨今竿牘全踈而門下於讀禮之餘示裁書之暇亭
雲愴目未迴攀栢之呼梁月興懷似憶燃藜之侶睠茲
德意敢有避心尚希乘淵潛隱霧之時究川濟為霖之
業是惟不負先公之義訓亦以仰酬聖主之恩私某倘
猶竊祿風塵庶得分華禁近謹謝不宣

答蔡明府

門下一枝挺秀片玉標竒某幸緣桑梓之恭獲遂芝蘭
之慕每念離鄉詣闕再逐風塵靡由縮地升堂虛勞夢寐
幸辱雲箋之賁疑親霽宇之輝損貺何因感知難報惟
鸞栖鳳舉本非百里之才矧雉伏蝗空已播萬人之譽
佇聞推轂虛法從而徵行慰執鞭奉清言以繹庶藉蓬
扶之助亦章萍聚之榮願殫駮猷用需驛召謹謝併祝
不宣

答汪茂才

曩依丘隴已隔光儀迨返闕廷愈踈音問幾動雲萍之感每緇月桂之期而公再罹大艱尚紆後舉得書興愴闕禮為慙惟不肖以廿年之資偶叨登進乃足下以一日之誼遠用慰存損貺甚隆感知彌激由負乘之差不淺肆懸車之夢常殷所望讀禮之暇無怠於讀遺經治家之心不分於治本業將冲天驚人庶乎有待即榮親信友亶也非遲謹謝併祝不宣

公與王相國對南

伏惟老先生赤心謀國九廟鑒其精誠黑髮還家四夷
詢其動定而虛瞻北斗未起東山帝心之簡在自真將天
意之治平有待某夙蒙履覆幸辱牆依誦袞衣赤舄之
詩堪輝日月望黃紙白麻之詔幾跂雲霄俄聞悼亡歎
此媿德蒙莊自達鼓盆之意可師洛社非間調鼎之身
獨重願言抑損用迓吉康薄有公申謹茲私布某臨風
不勝拳拳

答劉侍御在田

不肖自遘家艱久乖生趣再塵朝序虛負歲華屆茲桑梓有事之秋不淺蒲柳先零之感而公以吾一日知己之愛彌新如彼三秋懷人之思已切遠勤飛牘光佐舉觴顧不肖學等燭光幾興悲於老大養違鼎食敢為樂於劬勞麋鹿之性依然行投豐野犬馬之齒長矣何補明時拜貺增慙酬知倍切更惟清峻靡所報將率謝幸亮不宣

答劉太守應沙

不肖幸蒙推轂以獲濫竽自惟襪線之才無當冠纓之
路慮遭官謫仰辱君恩詎公勞輕案牘誼溢書函雙魚
遠致殷勤五馬懸知整暇河南第一漢庭治行誰先江
夏無雙楚甸才名久著公自保民如子業焦心賑貸之
施吾將以人事君行藉手循良之績庶其分美因以掩
瑕願殫謀猷用需艱大損貺謹拜訖率謝不宣

答季少司成青城

門下操觚東觀玉堂載其高文振鐸南雍壁沼欽其古
誼美樸棧歸作人之績悵萍蓬隔知己之歡歲報初聞
年華再易猥蒙芳訊深感至懷度黃紙之召非遙驛路
春風有待知絳帳之移漸逼橋門化雨難留謹復不宣

答唐漕院卞宇

惟運道為國家咽喉血脉之所關惟明公為主上耳目
聰明之所寄肆膺特簡爰借將漕懸知繡斧星臨百靈
効順佇見帆檣風駛萬艦如期帝命用光軍儲自足拜

函浣慰臨答瞻馳不宣

答周元戎

紫荆天險實控神京細柳雄軍爰資儒將臂腋托重而
恃力心腹居安而處優伊誰之功尚亦有賴屢當刁斗
之暇猥辱尊壘之貽深知桑梓情多轉悵萍蓬跡遠願
熙鴻伐行借末光率謝不宣

答劉在田

風塵作客歲月磨人感光陰之若馳悵吾生之虛度而

公依然念舊嘉與更新不勝萍梗之思猥佐椒花之酌
德則孔厚時與俱長歎過隙之白駒吾已極支離之恨
羨避人之驄馬公其崇耆定之勲謹謝併祝不宣

答賈操院春宇

惟留都為國家根本之區畫長江雅名天塹惟臺察為
政事紀綱之地開大府允藉人英我老公祖爰起田間
聿來江表霜清甬院官屬仰其威稜風淨鱗波島夷消
其窺伺永奠金湯之固良資文武之才力不數鐵鎖千

尋丹心報國身且作金莖一柱赤手擎天某渺望臺端
幸居宇下欣承榮問喜倍恒情謹復不宣

答查虞臯提學

門下挺秀武林擷英文苑妙年馳譽久趨南省含香大
省掄才遂借西江振鐸帝嘉綵筆士慕繡衣品題業見
殺青陶鑄誰誇隔絳不肖幸承衆美良賀人師願益弘
化雨之施將彌動文星之仰謹謝併祝不宣

答譚蜀撫岳南

不覲清光幾更歲月有懷明德奈阻山川欣承貢篚之
分獨抱濫竽之媿伏惟門下文武具足卷舒惟時揮白
羽以揚靈名高漢相配瑤琴而解愠聲動虞庭爭言金
玉其相早已備四時之氣佇見風煙以淨詎惟貽三蜀
之安某久逐淄塵幸叨素雅風來天末奉揚敢後簪紳
月在懷中珍重疑隨劍履謹謝不宣

答梅中丞衡湘

某偶承匱乏謬荷改遷自知才不逮人良媿處非其據

而門下遠者除目深用注心分裘帶之餘閒裝裁五色
借簪裾之渥寵意倍三薰某拜誨知榮酬知敢替久矣
孤忠貫斗早欽絕塞鴻名屹焉一柱擎天立見中樞驛
召庶荷聯履亦慰摳衣謹謝併祝不宣

答周大行弱生

淮陰一別江路千重念讀禮之將周恨封書之未寄茲
者遠承芳訊彌荷至懷情親不隔同心契濶聊同整面
顧弟處非其據彌增負乘之羞才不逮人轉篤懸車之

計何當屣棄用慰襟聯率復不宣

答孫中丞許西

竊以安石東山之望久繫蒼生子年北闕之情毋忘雅
故遠承芳訊深荷至懷伏惟老公祖才識合符文武具
足大斧按部激揚示百辟之刑單車入營指顧定一軍
之變早煩作鎮爰告居廬棲遲更以數年譽望元同一
日游希盤谷應多藉草新題夢到曲江却憶尋茶舊侶
辱以貳銓之耗猥勤尺牘之頒拜教為榮酬知敢替佇

見還中丞之節召起田間行者壯元老之猷救寧宇內
敢稱推轂庶遂盍簪謹謝併祝不宣

答陸同年

幸托維桑載聯擢桂早同意氣難渝金石之盟自涉風
塵爰示參商之跡頃違闕下似夢難堪忽隔天涯茲游
可念謫居並海河陽桃李誰憐賓幕依臺綠水芙蓉自
別永惟夙好猥辱遙緘弟誦以興懷奉之生色愧縻厚
祿敢忘推轂之恩尚覲良緣庶遂盍簪之想謹謝并以

損貶歸璧不宣

答史少府敬所

不肖未親芝府幸庇棠陰欣傳千家孔邇之歌想見一
郡太平之理自惟媮惰尚缺起居而老公祖分餘閒於
簿書筐篋之間飛遠訊於輦轂衣冠之衆遂蒙芒屨猥
賁萍踪幘幘真比二天夢寐堪紆兩地感知加額佩德
銘心倘可効其揄揚敢後黃童白叟何當被其容接行
瞻皂蓋朱旂謹謝不宣

答陳學院懷雲

堯階之莫英載新狄門之桃李逾茂望鳳城而渺隔邀
馳步以難期乃老公祖遠賁芸箋埒華椒頌遙瞻化雨
若坐春風誦義彌深感知曷替謹謝不宣

答畢司理白陽

法星久借雲間幸沾末照淑氣乍迴天上適奏成勞驛
召非遙騶鳴可卜而老公祖特勤記憶遠賁封題恍對
冰壺想見澄心似水幾緡玉律應知枯骨咸春佇參補

袞之班早慰執鞭之願謹復不宣

答王明府

公名家汗血藝圃前茅洵滄海之遺珠偶慳科目去山
城而握篆聊暢生平惟茲君侯下車發軔之初想見氓
庶扶杖載盆之衆公第力追古道孳孳務得民和將頓
起賢聲炳炳頻書上考不乏粉署豸垣之召益揚樞廷
麟閣之光損貺歸璧謹附謝不宣

答陳興化蓋菴

海邦作牧五馬稱其風流天闕程功七閩尊其威望佇
看高第徵九列之崇班庶績舊游修廿年之積潤幾勞
夢寐忽辱音書璀璨擬於瑤華綢繆究其環結不殊暫
面良慰同心若夫負纖翼以泰山策疲駑以廣駕豈其
實任誰謂可驅誦以周旋增其媿畏損貶隨例歸璧謹
附謝不宣

答郝江陰聚菘

竊謂河潤百里人仰二天惟江城爲梁溪接壤之區惟

明府為燕市從遊之舊春回化日已傳澤滿隨車路映
福星想見恩流錯繡不肖祇綠趨走未遂起居而老父
母從簿書倥偬之中示箋翰殷勤之雅不肖遙歌孔邇
敢急中藏願殫令猷用熙鴻烈謹謝不宣

答張州守溟池

不肖夙懷桑梓之恭久切芝蘭之慕幸緣職事獲與選
掄而公以南金大貝之才典東土方州之任雖於選人
已號為異等而於傑士尚視為麀麤官然公拜命而行捧

檄而喜洗手奉職尋孤琴獨鶴之風實心為民嚮賣劍
買牛之化想見行春露冕應知甘雨隨車茲惟循吏之
遺不忝真儒之用不肖遠蒙芳訊猥荷至懷篋分芸閣
餘清字爍芝燈異采暫時若對疑追五馬清塵何日重
逢終合雙龍紫氣謹復不宣

答陸運長自齋

門下操遠略而服鹽車處利權而貞苦節在部使監司
共高其守凡賢人君子多惜其淹茲者業奏成勞爰書

上考佇見橫飛直上漸躋斧鉞之崇亦惟遺大投艱永
勒鼎鐘之烈不肖猥緣職事累荷記存遠辱函書載勤
損貶心盟初服敢分羅衣在筭之珍路指迷津謹拜繡
佛長齋之供願言亮在彌切感慙謹復不宣

答朱長葛惺復

不腆江縣實累賢侯蕞爾葛城乃來仙令銳志想更新
之治誠心見敦故之思拜教為榮酬知敢替佇俟期月
三年桃李陰繁花縣還者一日千里桑榆譽起蘭闥勿

以傷弓怠於製錦損貺隨例返上謹謝不宣

答高憲副青崖

自別春明倏更歲序每緣日隔想見風流快最績之來
聞欽貲恩之下逮勞徵分竹典渥賜金茲臣子之極榮
亦友朋之共契不肖偶緣職事獲廁觀成佇見除書還
欣陟要即節鉞之操非遠將鼎鐘之業可期願彈壯猷
用迓新命損貺敬拜謹謝不宣

答譚中丞岳南

弟空懷素尚久逐縑塵追惟同片玉之科表樹遜雙金
之許而翁丈猥敦夙好彌示同心宮笈分紉搖動恍依
明月天香出袖奉揚真被仁風吹拂良多拜嘉知重謹
謝不宣

答程方伯居左

方岳在瞻久欽名德高山可仰未覲清光欣承貢笈之
分偏抱濫竽之媿伏惟門下文武具足卷舒惟時揮白
羽以揚靈名高漢相配瑤琴而解慍聲動虞廷爭言金

王其相早已備四時之氣共賀烽煙已淨詎惟貽三蜀
之安不肖虛逐緇塵每慚素食風來天末奉揚敢後簪
紳月在懷中珍重疑陪劍履謹謝不宣

答吳臨川本如

竊惟化徵馴雉遠分桑梓之榮望隔登龍未遂芝蘭之
慕而書來北闕言自西江戴星自斲餘閑芳訊獨先於
故壤滿歲已臻上考虛懷翻劇於初官雙鳧一鶴雅足
雲霄威鳳翔鸞寧栖枳棘不肖偶承人乏濫貳天曹深

慙衡鑑之司慮辱簪紳之路即看高第晉居補衮華階
庶拜下風克慰更衣積願幸熙永譽用迓徵書損貺隨
例返上謹附謝不宣

答黃司成教庵

伏念弭旌壁沼振鐸橋門登歌流蘋藻之輝聽講極衣
冠之盛人推稽古士頌得師而門下遙思索筆之朋猥
示橫經之暇遠勤書問亦荷幣將茲惟至懷敢不下拜
今主上方隆廣學弘文之理而門下適秉興賢敷教之

權瞻化雨以維新詩賡新頌賀為霖其不遠詔許延登
尚冀鼎調用需甌卜謹謝併祝不宣

答杜太守見田

辱以令節馳此芳函歎天涯風俗之同識時序推遷之
異心驚懸艾契感紉蘭拜貺為榮酬知敢替謹謝不宣

答周明府

丈錯采海邦流聲天闕弟早偕擢桂遙想歌棠色喜可
知跡遐為恨而忽來甚曠恍對芝顏深承荒政之苦心

益想窮民之加額佇騰剡薦行副弓招庶慰盍簪不虛
捧檄損貺隨例返上謹附謝不宣

答王太守玉沙

竊惟河潤九里故甘棠蔭於其隣人仰二天由桑梓澤
於其德祥瞻下鳳望隔登龍而老公祖蔚以最聞枉其
書訊箋裁郡閣濤聲分鐵甕之清坐想江樓天宇皎玉
壺之潤譽問獨高於五馬思馳行下於雙龍不肖幸以
職司與觀盛美雖不獲追隨老稚賡來暮之歌其猶將

指點江山展孔邇之慕損貺隨例壁掌記謹謝不宣

答王學博

公文雄彩筆業擅青箱猥煩振鐸之行光萃盍簪之益
陰繁桃李造士多於泮宮念篤松榆懷人極於雙闕甚
賤遠墜芝宇疑親龍頭應屬老成榮名有待牛耳久司
盟主妙譽先馳冀敦學以相成乘時會而大舉損貺隨
例壁掌記謹謝併祝不宣

答王別駕豐興

惟門下家承綵筆世美青箱名在詞壇盟主歸其牛耳
謫從畫省驅車輕彼羊腸爰屈高賢左遷雄郡天宇皎
玉壺之潔不染一塵濤聲分鐵甕之清獨持三尺不肯
潤沾九里覆仰二天蔽隣幸蔭甘棠澤德不殊桑梓祇
緣奔走未遂起居而遠承問訊之隆想見殷勤之誼縱不
獲追隨老稚同賡來暮之歌庶猶將指點江山遙伸孔
通之慕濫竽未已推轂敢忘損貶隨例壁掌記率謝不

宣

答謝理刑武林

惟吳興為山水奧區夙稱雄郡而門下比星雲顯瑞共
識高賢遠借刑名用煩推鞠金科夜檢萬口以為不寃
丹筆回春一方可使無訟績聞守辰恩逮庭闈天垣之
驛召非遙皇路之趨呼有待不肖久欽譽問未挹光華
茗雲波澄鳩署之清可想竹梧風細龍門之御將攀猥
辱芳函何當盛意損貶隨例璧掌記率謝不宣

答盧太守龍巖

伏惟分虎畫熊，鳳推師帥，懸魚下鳳，雅重扶馮。治行真二千石之良聲，名自十六州之最勞。徵剖竹典渥，賜金不肖，偶廁職司，與聞盛美。矧緣鄉曲，曾忝交知。幸荷芸箋，疑親芝宇。功能已試於三輔，即鈇鉞之借，非遙次第。行入為九卿，將鼎鐘之銘，可俟。願終茂業，用迓鴻庥。損貺隨例，璧掌記謹，謝不宣。

答張觀察蓮濱

惟菁山為吾師傳衣之地，而門下其密親。惟白岳為吾

鄉錯繡之區而門下其察使粉榆社接春風似覆棠陰
桃李門遙暮雪疑逢芝宇偶慳御李真媿識韓而門下
輕朱旗按部之勞神交北闕借丹筆治書之暇使發南
郵指倍三薰箋裁五色不肖奉以增媿藏以侈榮追惟
攬轡名高鐵斧乘驄夙樹澄清之烈茲喜建牙事近麟
臺策駿彌徵保障之勲願殫壯猷用迎殊眷即廟社因
之篤祐豈門牆藉以分光損貺隨例璧掌記謹謝不宣

與蔡太宰見麓

惟皇天有意國家惟聖主克知宅俊故雖兩持半載勿
下新綸良由一德三朝獨高舊格爰正統均之席再提
人物之衡水鏡添澄金甌待鞏不肖深慚挂議敢覬分
華心勞聽履之思長懸北斗身決抽簪之計議趨東風
老公祖庶幾併日而趨不肖某猶當望塵而伏願無俟
駕用答臨軒某臨楮不勝瞻依

答譚中丞岳南程左使居左

不肖久混洛塵竟踣蜀道虛疑水鏡抱明月於懷中孰

惜冰紈借清風於掌上空憐憔悴只合棄捐而仁凡渙
采封題分華貢筮惟賢哲之用心自無涼燠在士人之
酬世因悟卷舒伏枕拜嘉撫函珍重雖望紅雲於雉尾
不獲重奉光輝而浣白石於磯頭粗可自完貞潔敢希
吹拂聊當奉揚謹謝不宣

答杜大守見田

不肖諧時計拙去國身孤乞骸奈隔九關偏格呼天之
奏銷骨况嬰百病每需續命之絲而公深懷廿載之舊

知不廢五辰之故事貽之芳訊佐以黍資敢不拜嘉緣
而感歎三湘競擢空傳遺恨層波五月披裘誰信貞心
一水古嘗有此今何不然輒因報械畧抒孤憤率謝不
次

與三閣下

某欣遂乞骸悵違握髮家山秋老歸逢開徑之期相舍
天高夢斷埽門之路憶昨風波震恐賴廟堂公道力剖
上前肆今雲水清夷即湖海孤踪安游物外一去懸車

席寵向來推轂知恩爰拜朔風載瞻台斗惟軍國紛綸
之日正相師旋轉之秋願樞軸永膺赤手共親扶日月
庶藩維不聳閒身亦穩卧煙霞謹謝併祝不宣

與九鄉

不肖幸馮福庇獲荷恩休歸及晚秋松菊正舒三徑睡
慵朝日風槐真隔九天追惟割席兩曹夙奉上公之履
以迨杜門半歲屢停長者之車感倍恒情緣應異世聊
因還役仰謝守閭共虞國步多艱赤手願親扶日月佇

見藩維不聳閒身亦穩卧烟霞謹祝不宣

與宮坊翰林國子監

不肖幸席寵幘獲蒙恩放秋疎菊徑乍欣初服之還天
斷蓬瀛倍篤同袍之戀永懷至誼疑隔前生敬報歸來
因明感慕惟帝資良弼早承霖雨之求庶人樂太平長
穩烟霞之卧謹謝不宣

答陸中丞仲鶴

不肖解紕風波投竿煙水焚魚陞遠世緣已悟空花羅

雀門閔物態甘同遺核而門下獨深神契彌篤心期分
栢府之餘清書裁五色賁芝函之委潤指倍三薰割廩
孔多轉媿緇衣之好買山不乏兼堪蠟屐之資劍合何
時珠銜有日所願入襄袞宸晉秉樞衡捧日力轉重輪
擎天身為六柱庶檣櫟見太平之澤而菰蘆皆穩卧之
年謹謝併祝不宣

答孫棻蕪屏湖

不肖幸逃世鞅獲遂初衣叢桂可搴聊托跡避人之隱

蓼莪終廢每傷心
生我之辰猥辱舊
游却憐初度清分
簿領書檄岱岳雲
英惠割俸錢錦借
河陽花色言欽高
義真荷至榮自惟
馬齒暗增蠟屐布
帆雅堪送老仍喜
鴻冥漸遠驚波駭
電豈復關人第吾
知已騰茂異之聲
庶予餘生藉光華
之潤願言努力庸
慰遐思率謝併祝
不宣

答許同年

竊以名聯擢桂幸
同片玉之科會阻
班荆久負斷金之

好每歌皎月輒望文星未遂問竒每緣話舊而吾老年
丈懷人歲底發使春前竿牘遙分暫輟詩書之暇篚筐
載錫尚流俎豆之輝深荷至情敢忘高義所願龍頭晚
屬起魁名於絳帳不讓少年庶令驥尾風生沾末照於
青林終輝暮景謹謝并祝

答吳學博

不肖獲遂焚魚久安失馬湖山無恙布帆蠟屐不倦登
臨風月可親石枕竹床儘供偃仰凡人間幻景絕不關

心第天未交遊頗猶縈念深惟修阻難遂合併而公分
臯比之清陰箋裁五色割脯脩之薄俸惠過百朋誰誇
在泮之藻芹堪艷盈門之桃李受而下拜鏤以中藏龍
頭必屬老成不遠雲程消息驥足何妨晚騁終看天闕
游行庶子棄捐亦沾華寵謹謝并祝

答陸明府存吾

不肖涉世寡諧屏居多病門堪羅雀札鮮通魚而公獨
敦一日之知連發兩春之訊深承至意載辱多儀下拜

為禁中藏敢替惟慈君行縣譽滿桑麻庶知已在林光
分桃李所希努力言慰遠心謹附謝薄有不腆具儀東

答楊侍御意白

憶在徂秋曾來舊雨澤亭日晚深憐畫鷁難留京闕天
高想見青驄共避尋膺特遣徃按全遼惟此一時難應
百倍鄉止憂敵憂倭而今且憂閭閻誅求之太急鄉止
寃戰寃守而今且寃官曹議論之相攻彈壓獨勞驅馳
良苦乃公誼敦一日望斷重雲即磨盾作檄之餘裁書

不廢當散金酬士之後分俸相存人真遵海而南信若
從天而下丘園借賁閭巷增榮所願力持財賦之衡身
作金湯之固繡衣鐵斧遠清絕塞之塵露布銑歌光振
中朝之烈謹謝并祝不宣

答顧州守

春明一別歲屬頻更新都昔領青衿夙勤注意故國重
開絳帳每荷傳書無忘久要已見高義茲日邊五馬茂
恩乍典方州乃天畔雙魚芳訊先投下里溫然道故若

威儀笑語之親承黯爾憂公惟社稷民人之曲軫肯讓
龔黃之理為期月而可觀敢同管鮑之交積歲時而彌
篤猥蒙損貶深媿榮施不肖澤國閒身明時棄物不作
風塵舊夢頗安泉石餘生佇聽顯休用光岑寂謹謝并
祝不宣

答林太守

曩托同曹選地曾欽水鏡邇臨下里炎天恍挹冰壺誦
義方殷含誠未展而門下載飛箋訊兼墜筐將世態悠

悠於不肖如遺核而獨示以久要塵心漠漠於不肖如
空花而尚期之再辱愛踰肺腑榮借齒牙何來長者之
言自識幽人之分顧時政爭趨竭澤惟仁賢咸屬濟川
積方寸而家慶遙臻已兆百男之瑞寬一分而國基孔
固彌徵三老之歌全材推廟社之良砥柱作闕河之翰
謹謝并祝不宣

答王節推振宇

公才遶竹箭品埒冰壺夙推東越之英共擬南宮之選

十年空獻策，黷官乍領青。趨萬里獨揚旌，徼郡還需丹。
筆洞庭下水，葉遠擲瑤華。澤國亂蒹葭，疑親玉樹俸。分
官解深知鮑子之情，貧付酒家不負陶公之興。榮分桃
李，寵藉蓬茅。惟祥刑操三尺之平，蚤聞妙譽。况勁節聳
千尋之直，愈想高標。遲爾內徵，慰予私佇。謹謝不宣。

答葛明府

不肖幸聯桑梓，雅習芳名。廿老辟蘿，難通燕訊。而門下
獨敦古誼，不靳先施。五色華箋，雙南惠重。前身知勾漏。

今姓落人間舉手見武夷君仕游天上神仙作吏邦國
稱良不肖捧牘分華因風誦義猥荷高賢之盼敢忘知
已之酬謹謝不宣

答朱太守午臺

自公適郡忽已兩朞維子懷賢有如一日雖山川間阻
面晤為難而音問頻通心期若對茲承使貺特賁箋書
深知記憶之同遠諭興居之槩會聞新命彌慰久要截
鐙攀鞍想見建水悲歌之切焚香擁幃懸知溫陵跂望

之殷璽書徵帝寵之優節鉞佇羣心之屬不肖樗櫟之
質業遂川觀萋菲之談猶煩波及幸公等心知不乏抑
吾儕身隱焉文拜牘分榮臨風誦義謹謝不宣

荅徐溧陽十洲

千里通家下榻幸逢徐孺二天接壤舉觴敬累蘇章猶
阻因循尚稽問訊而公屬蒞官行政之初偏深念舊當
禦侮折衝之暇不廢裁書久要慙楮墨之溫殊禮駭篚
筐之侈下拜因而藉手中藏矢以終身惟溧稱首善之

區爭却五千金已聞謳頌惟公抱殊尤之器奠彼十萬
戶乃擅熙鴻願言殫心以慰傾耳謹謝不宣

答王平湖念惺

座擁飛鳧蓬華爭迎茂宰河傳渡虎粉榆不乏來賢每
跂英風轉思舊雨媿乖訊問欣荷殷勤鞠彼子民簿領
應勞响沫眷予父友箋書猥示吹噓燦然文麗七襄共
識名揚製錦卓爾政成三異懸知化美鳴琴青蚨分仙
令之滄錢綠蟻佐閒人之酒債自惟棄物難忘高情尚

希績最循良，畏壘深貽大澤爰。見榮施雅故，通家亦借餘光。努力為期銘心，敢替謹謝不宣。

答陸令存吾

花縣宣和茂，起三年之績。萱堂背養長，違百載之歡。閭乍失慈君，道路咸稱孝子。抱終天之恨，讀禮思深。追一日之知裁，書寄遠。暫輟哀於苴蒯，承分惠於筐筐。猥荷榮施，轉慙闕禮。關河迢遞，蹉跎未展。一芻日月，居諸想像。空懷寸草，願保先人之遺體。且慰舊民之去思。節

順為期熙鴻有待率謝不宣

答顧州守

不肖犬馬增年蟲魚送日老知將至幸為澤國閒人名
疾弗稱久作清朝棄物而公獨敦高義每念舊游見秋
月以懷人夢落山中叢桂因晨風以發使光搖戶外枯
蓬遺書分君侯退食之間割俸佐賓客行觴之費下拜
因知所報中藏曷敢有忘爰期報政成功早備棘槐之
選因獲藉榮邀寵彌添桑梓之輝謹謝并祝不宣

答賈臨淮

絳帳譚經未撤春風之坐銅章試吏初呈冬日之輝離
情悵縮地為難遠訊欣從天忽下睠惟巖邑幸借異才
察眉籲閭閻疾苦之由力與疲民作主噓骨明湯沐本
根之重爭言太祖有靈下車已見永圖張琴應多妙用
想花滿河陽之日即異時桃李與有光華期棠敷南國
之年雖不腆薜蘿還沾覆冒願聞來譽彌慰去思謹復
不宣

答吳乳源赤含

五羊天遠難聆韶石之音雙鯉人來又見嶺梅之色頻
承至意不有遐心公試令仙源整神吏道除衆庶百年
之蠹弊絕風清執當官三字之符政成譽起剡薦已聞
獲上桑祈况頌回天業已同中年之無蝗何啻似泰山
之有虎誼敦一日雖心煩思職不惜裁書望隔三秋雖
面瘦憂民轉勞分俸禮意責鹿門之隱榮光穿雀戶之
羅下拜能忘中藏敢替公來何暮想民間倚命方殷汝

用作霖知天上徵賢有待願終美業益殫宏猷謹謝不
宣

答方明府

海邦擢桂名高徵鼓瑟之詩江縣栽花政美著彈琴之
理雅勤嚮往未遂掘趨敢綠姚江一日之知遽談水木
不遠金斗千山之路忽下魚鴻書到從天人疑縮地布
幣明緇衣之好分金佐蠟屐之資寵錫多儀祭施棄物
從茲倚玉能忘說項之頻媿彼報瓊行副識韓之願謹

謝不宣

答錢太守養庵

澤滿江鄉茂宰留二天之庇政成巖郡慈君布兩地之
和久媿投林末由趨府敢希念舊雲霄忽下雙魚猥荷
分華林莽疑逢五馬何殊斲對極慰相思殷勤綠割滄
錢潦倒堪償酒債歲聿云莫春風回蓬華之寒日以為
年白露益蒹葭之想惟大計定推異等錫金知獨重幃
帷抑舊民偏戀遺恩建節冀重瞻衮繡遮迎有待仰頌

為期謹謝不宣

答張儀部又白

曩辱徵言深慙引重遙想高堂介壽大椿之日月方長
載惟空谷棲賢叢桂之烟霞好共祗綠修阻難可過從
敢勤千里之思重賁十行之訊珠璣錦繡書裁五色之
華彞鼎玄黃物備百朋之貺精心遠注使指仍嚴下拜
汗顏中藏次骨遍除倥傯率寓空槭練日從容還修報
悃謹謝不宣

答薛明府

逖矣五羊賁然雙鶴懷人萬里華箋徵落月之思作令
孤城皂蓋想行春之盛此地故海濱鄒魯惟公實當代
龔黃政美琴堂即驅鱣還珠何難軼古名書黼辰即乘
驄佩玉立見登朝願展大猷用臻成績何啻花封耀采
永垂慈父之歌亦使梓里分榮遠借陳人之寵所頒損
貺下拜知慙聊寓空槭中藏不替

答楊侍御意白

西臺執法夙欽仗斧之雄南國掄文特借持衡之重以
吾一日獨有二天敢誇平生知己假桃李之榮光實賀
多士得師侈粉榆之盛事比者津途捧袂極知唐哭榜
人俄而里巷傳旌轉懼動煩騶馭萍分漸渺芒負如新
忽飛箋來自鳳凰之陽度校藝甫當衝馬之暇遠道恍
親玉案炎天疑濯冰壺載割滄錢堪償酒債自惟菲德
猥辱鴻施所願辨才於甘苦疾徐之間凡枝葉浮華稍
從芟刈庶其收士於驪黃牝牡之外此本根重地永作

楷模惟貞臣純心事君果不第以身乃吾黨藉手報國
亦何必自己并希崇護爰慰逖思謹謝并祝不宣

答方明府

向辱遠存想像每依金斗尚虛良晤依稀似挹水壺愛
屋上之烏誰肯推恩水木驚門前之雀偏煩賁貺雲林
割庶吏餘錢以佐酒資恰喜春來天上函仙人舊錄以
祛塵慮恍疑身到山中庶勤望舄之思彌篤摳衣之願
空緘志感永矢為期

答耿常熟藍陽

夙欽藻譽不後秦瞻幸接花封欣沾河潤自惟嬾情未
遂參承而老父母猥賁華箋特垂腆貺香承梅萼頒歷
藉以生春暖動椒花授餐佐之卒歲寒灰借色暮景知
榮深媿厚施敢忘明德惟使君之為政與日俱新將隣
國之仰流如風必偃試省衣帶一水非遙行望履綦三
薰有待

答陳烏程端瀛

路隔茗溪玉鳥每瞻天上人來花縣瑤函忽墜雲中未
遂執鞭快逢傾蓋竊惟明公海邦才子巖邑神君戴星
不廢彈琴治高單父禁火仍聞歌袴名軼成都三年兼兩
地賢勞一日竹九天特名深惟樗櫟久擯菰蘆半子情親
傲寵內慙陽橋二天恩大推榮真比屋烏業荷幘幘轉
勤筐篚元黃錯采遙徵製錦之奇清白騰聲彌習飲冰
之操三薰有待九頓為期

答勞當塗金粟

不肖樗櫟閒身菰蘆棄物雖高山共仰久欽綰綬之名
乃荒野終逃空切執鞭之願忽聞使命來自官衙書擬
從天人同縮地趨府爭誇綠鬢親栽滿縣之花入宮偏
妬紅顏轉畏當途之棘世情自爾明德何疑田郎早注
御屏詎必吹噓送上葉令頻飛仙鳥行看詔令徵還識
韓應慰素心說項敢私微力筐篚拜非常之賜瓊瑤慙
不腆之將

答陳安吉

公車久壓名流人推老驥仕軾新煩僻郡帝寵飛熊竊
慕執鞭未遂傾蓋而門下獨標古格不靳先施露冕裁
書論交在形迹之外承筐布幣將意於禮儀之先深荷
久要敢忘永好惟山鄉作牧兩浙獨此一州度幕府程
賢百城無先五馬歌棠已遍位棘非遙願殫鴻猷用紓
特召

答張兵憲雲臺

惟公節建海邦甫踰半載以我衡棲閭巷業拜三函茲

屆朱明仍勤赤牘光搖綵縷飛箋粲若葵榴譽播素絲
割俸佐之蒲黍深承篤眷良慰離居節序驚心年去惜
年來虛嗟往日雲烟極目江南望江北幸接仁風

答金水部啓心

曩俾使節榮分羅雀之門遽隔仙槎影斷飛鳧之路祇
緣促別未遂留懽遙望石頭開署正臨山色近傳除目
汪銜光借水衡展采方新熙鴻有待不肖才非用世性
復耽閒已堅榆社之盟不作木天之夢遠承芳訊虛負

至懷

答倪武進六符

月近中秋解識光
聯列宿風清百里欣
逢壤接二天不
隔素輝幸臨佳節
神仙作令前身曾
到廣寒佐史同游
後夜定聞清嘯懷
人則屋梁動色飛
使而甕牖分華五
彩箋呈已見香浮
叢桂三更夢斷曾
知影借甘棠慈君
普照何私共指當
空懸玉鏡野老未
光偏被何妨永夕
醉金樽謹因報械
聊抒謝悃不宣

又答

見月懷人方荷久要之訊問年知老載貽初度之榮循
髮增慙銘心志感賴有二天之覆福星不遠花封寧懷
百歲之憂殘日漸低蓬戶賦賡叢桂四方之志已灰詩
廢蓼莪我之恩難報長犬馬之齒真是虛生狎麋鹿
之羣祇應遯世猥煩記憶敢昧光華

答張雲臺

臘日凝暉暮景感山中之歷晨風借翼先春來江上之

書載承節例之班彌見交情之重官梅遠寄揚州正憶
何郎社櫟虛生漆圃媿同莊叟錦帙分從甲帳猶懸鄴
架之籤金錢割佐辛盤頓益阮厨之酒醜顏下拜鏤骨
中藏

賀葉相公臺山

金甌定相麻宣侈螭陞之殊榮玉鉉登朝鼎召傳鳳城
之盛事紹虞室五臣之烈孚商家一德之交伏惟相公
閣下學本儒宗才優帝佐簪筆而游東觀早富經綸秉

衡而宰南曹彌精品藻雅收公望特簡上心欽褒除使
命之並隆驗夢卜人情之允協憶閩海自楊文敏而後
今始見癸未二輔之同升考留銓由張文毅以來恰將
過甲子一週而再見氣數之亨非偶人文之萃有時去
踏沙堤知舊侶望塵而拜來瞻巖石度羣工班路而迎
未艾掌樞機三握猶看黑髮匪躬謀社稷一生獨矢丹
心推車副虛左之求當軸運處中之畫回天捧日決壅
蔽長諧魚水之歡酌斗作霖蘇疲民不負龍雲之會媿

震澤一閒人已矣敢效彈冠度台陞大知已在焉還餘
望馬謹賀不宣

答耿常熟藍陽

絃歌洽化春風宣被物之和竿牘傳情歲序動懷人之
想花封布令葦戶生輝老至驚心又見山中厯改客來
開口寧教座上杯空幸分玉食之餘私慰桂薪之感栢
椒藉煖藜藿知恩

答喻宜興養微

青郊轉律噓枯占淑氣之催赤縣鳴絃撫景藉和風之
入陽回動地寵錫從天喜逢隴上春來驛梅遠寄怕見
山中歷改社櫟瀕衰殷勤猥濫滄錢早見椒盤借色潦
倒堪償酒債爭看華戶生輝望二天河潤重新隔百里
泰瞻如對登龍有待躍雀為期

答余江陰

一鶴依人三縣爭傳異績雙鳧謁帝九天忽下徵書方
茲促裝就駕之初想見截鐙攀轅之衆而老父母特深

記憶留示殷勤寵責書函榮分資斧不肖風沾河潤難
忘去後之思遙拜峴碑轉切初來之慕尚願孤忠扶日
月朝陽符鳴鳳之占庶幾高卧穩烟霞晚景遂眠鷗之

適

答張關尹九岳

吳關月出正逢秋色平分漢署風清想見寒光咫尺迫
臨佳節深荷至懷五彩箋裁已覺香浮老桂三更夢斷
縣知影度疎桐意前身曾到廣寒共羨神仙作吏度後

夜定聞清嘯何妨佐史同游飛侍未由注存良厚酒資
遠餉盈盈好醉金樽明德難忘耿耿如看玉鏡

答施世兄麟陽

宮牆俎豆推隆見崇德之遺弓治冠裳濟美徵象賢之
盛惟吾師之有子卓有父風雖獲士不乏人孰肩公論
猥余綿力久負異恩詎有胸而無心每慙築舍欣一倡
而百和聊慰及門那敢貪天真同得歲龍城在望難忘
立雪之年鱸座重新誓守飲冰之訓是所以報如何為

懷

卷五

答魯烏程蘭若

傾蓋定交列宿動山園之彩下車求瘼新陽迴澤國之
和哀飛鴻知謀野方勤凜馭馬度納溝是懼而不廢薰
葭之想毋忘蓬華之歡望秋月以懷人箋裁五色因晨
風而發使惠燦百朋真同改緇分纒之溫難寫照膽輸
心之感仁風永拂素履增慙乘饑渴而施恩岷石先傳
墮淚遇盤錯而知利越城猶羨蜚聲

答張戶曹九岳

葭灰應律履長符綵線之占芸馥分箋頌慶荷緇衣之
好寧希節貶猥及衰遲微陽見天地之心君子今者道
長晚歲穩烟霞之卧陳人自喜身閒懷德難忘藉榮非
一歲寒不改敢渝松柏之盟暮景堪依常挹芷蘭之氣
誰傳進襪不後執鞭

答陸令存吾

一官三仕郊迎慰騎竹之歡百里十年巷頌益憩棠之

慕由吏民之相得有素肆怙恃之同情不渝爭傳飛鳥
下重天良緣不淺共卜明珠還合浦佳話方新可知近
悅遠來真是駕輕就熟政惟由舊譽克永終猥煩削牘
之勤彌見鳴絃之暇遙分五斗適屆一陽律動葭灰從
此欣看道長名題剡薦從前已信功高慎旃百尺之岑
添却萬分之美

答張九岳

歷改山中北望紅光通薊闕春回天上東來紫氣滿吳

關節例遙分榮施累辱折梅寄芳信懸知香動羅浮爆竹
思華年堪歎景瀕蒙谷嗟暮齒幸因卒歲喜寒灰實藉
生恩柳看青眼之舒椒擬赤心之頌

答申相公

伏念某齒增犬馬身似鷗鳧追歎無間深孤謬眷而老
先生特垂鼎記猥示賁存寵以如椽榮之在筍某歸幣
拜軸蓬茅揭以生輝改價回春樗櫟因之不朽三生有
幸九頓何期

答陳戶曹蓮湖

卷五

交逢傾蓋垂光分玉宇之清惠佐持觴普潤挹璇霄之
彩時惟佳節深荷至懷而不肖偶為白門之游重荷赫
蹠之賚茲榮再賁彌惕私悰五色箋裁已覺香浮老桂三
更夢斷還憐影度疎桐惟公前身曾到廣寒漢署羨神
仙之府媿我斯多方淹逆旅庾樓虛佐史之班飛侍寶
難注存何厚酒資重餉不妨仍醉金樽明德敢忘從此
長依寶鏡

答何南二太史


東寮接武近臣通，鶴禁之班南國掄。
文多士慰龍門之御，自惟中廢久隔清塵。
敢以舊游仍希末照，而門下燕
甫終於歌鹿信已托於征鴻。
翰札緘情，祭矣見芸閣故
人之雅賢。書卒業依然還藝林，先輩之程升朝重片玉
之科懸市空千金之購。朱衣顯異，賀桃李盡屬陶甄華
袞推榮，嗟桑榆猶蒙眷注。仙槎下八月，曾勤犯斗之占。
使節迴雙星，轉動登瀛之羨。因風布謝，作雨為期，不宣。

答楊常熟太洪

絃歌洽化陽和宣被物之仁竿牘傳情時序動懷人之
想花封布令華戶增榮爆竹思華年怕見山中厯改折
梅寄芳訊欣逢天上春來授粲承節例之頻頌蒙潤覺
恩暉之孔通噓枯起仆念寒灰漸藉生溫去故迎新嗟
暮景幸同卒歲椒擬赤心之頌柳看青眼之舒謹謝不
宣

答商司理調陽

名家夙侈三元箕裘裔美劇郡親持五辟鈇鉞民威遙
欽薦剡之騰具識刑書之慎駕鷺車而問俗質成應滿
閩方坐鳩署以懷人飛訊獨先吳地裁箋燦丹筆字挾
層霞茹蘂凜冰壺俸分五斗真不替三秋之慕尚無忘
一日之知下拜增榮中藏勿數



宗伯集卷五